



## SENKA SOJKIC, PRIPADNICA SIPA U JUZNOM SUDANU

# Svaki dan gledam ubijanje nedužnih civila

• Napuštanje raseljenih i ugroženih osoba, posebno žena i djece koji trebaju našu pomoć, za mene nije bila opcija • Borba sa malarijom

Razgovarala: Amra BRKIC - CEKIC

**• Predloženi ste za najbolju policijsku službenicu Mirovne misije UN-a. Na osnovu čega ste nominirani za ovo priznanje i očekujete li da ćete biti izabrani krajem ovog mjeseca?**

- Misiju UN-a u Južnom Sudanu započela sam u aprilu 2013, gdje sam kao policijski savjetnik raspoređena u Bentiu, Unity State, koji je nakon decembra 2013. postao najrizičnije područje u toj državi. Uprkos činjenici da se radi o izrazito nesigurnom okruženju, gdje se nalazi najveći broj raseljenih osoba na ovom području (47.124) i gdje se svaki dan susrećemo sa lišavanjem života nedužnih civila, bombardovanjem, nedostatkom vode, hrane i struje, do današnjeg dana nisam tražila premještanje u drugo područje. I dalje se nalazim u Bentiu i ispunjavam poslove i zadatke iz djelokruga mog rada kao pripadnica UNPOL-a (United Nations Police), u okviru UNMISS mandata.

### Najbolja polaznica obuke

Moram reći da mnoge kolege nisu mogle podnijeti ovu situaciju, stresno i naporno radno okruženje, te su zatražile premještanje, a nakon toga su raspoređene u druga manje rizična područja. Napuštanje raseljenih i ugroženih osoba, posebno žena i djece koji trebaju našu pomoć, za mene nije bila opcija. Moj angažman kao pripadnice UNPOL-a, te rezultati koje sam postigla ovdje, kao i činjenica da nakon svega i dalje želim ostati ovdje i pružati pomoć i zaštitu raseljenim osobama, ono su zbog čega sam nominirana za TOP FEMALE UNPOL UNITED NATIONS MISSION IN SOUTH SUDAN. Izbor i dodjela nagrada održava se krajem ovog mjeseca u Kanadi, na konferenciji IAWP 2014. International Association Women Police, gdje će biti oko 600 predstavnika raznih policijskih agencija zemalja članica UN-a, kao i predsta-

vnicu većine mirovnih misija UN-a. Samu nominaciju smatram izuzetnim uspjehom. Sretna sam i zahvalna što su moj rad i zalaganje prepoznati i priznati.

**• Kako ste stigli u Južni Sudan i možete li objasniti našim čitateljima šta je zapravo Vaš zadatak tamo?**

- U Južni Sudan sam stigla prijavom na konkurs koji je raspisan od Ministarstva sigurnosti BiH za policijske službenike, a nakon uspješno obavljenog intervjua koji su provodili pripadnici UN-a. Prije prijave na navedeni konkurs završila sam predmisionu obuku u Centru za podršku mirovnim operacijama u Butmiru, u organizaciji UN-a i Ministarstva sigurnosti BiH, na kojem sam proglašena najboljom polaznicom obuke. Po dolasku u Južni Sudan u aprilu 2013. kao pripadnica UNPOL-a raspoređena sam u Bentiu, Unity State, gdje trenutno radim kao vođa tima za zaštitu že-

na, djece i ugroženih osoba, rad policije u zajednici i reformu. Moram napomenuti da se od decembra prošle godine mandat UN misije u Južnom Sudanu promijenio i sada se odnosi prvenstveno na zaštitu civila, monitoring i istrage kršenja ljudskih prava.

**• Zbog čega ste se prijavili za odlazak u krizna područja?**

- Odlaskom u mirovnu misiju svaki policijski službenik stiče iskustvo koje je neuporedivo sa bilo kojim drugim. To je prilika da svoje znanje podijelite sa policijskim službenicima iz cijelog svijeta i nauči-



te nešto novo od njih. Takođe, želja da pomognete neudržanim osobama, posebno ženama i djeci, razlog su zbog kojeg se svaki policijski službenik prijavljuje za odlazak u mirovnu misiju. Prilikom boravka u mirovnoj misiji upoznate jednu novu civilizaciju, njihovu kulturu, tradiciju, običaje, a koji se potpuno razlikuju od naših. Svaki dan gledate žene koje naporno rade po cijeli dan, a nemaju dovoljno hrane da prežive, djecu koja nemaju nijednu igračku, a opet se se znaju radovati. Oni su sretni kada razgovarate sa njima, kada slušate njihove svakodnevne probleme i znaju da radi- te sve što je u vašoj moći da im pomognete i da ih zaštitite.

### Timski rad

**Možete li nam kazati šta je najgore a šta najbolje što vam se desilo tokom Vašeg boravka u kriznim područjima?**

- Najgore je vidjeti ubijene nedužne civile svuda oko vas i djecu koja su ostavljena na ulici, jer su im roditelji ubijeni. Teško je prihvatiti činjenicu da se to dešava svakodnevno. Za mene je težak momenat bio kada sam u isto vrijeme imala malariju i gripu, te nisam imala vode, ni struje danima, a temperatura zraka je dostizala i preko 50 stepeni. Tada sam bila jedina službenica iz bh. kontingenta koja je se nalazila u Bentiu i bilo mi je zaista teško. Međutim, nekoliko dana poslije borbe sa malarijom, na internetu sam gledala svedjenu UN-a na kojoj se govorilo o ženama u izgradnji mira u postkonfliktnim situacijama i tada sam čula govor savjetnika Mirze Pašića. U svom govoru on je pomeno mene, imenom i prezimenom, i poručio svim nacijama da je moja zemlja BiH ponosna na mene. U tom trenutku sve je nekako

dobilo svoj smisao, sama misija i predstavljanje BiH ovdje.

Najbolje što mi se dogodilo jeste osjećaj zadovoljstva kada nekome spasiš život i pomogneš da preživi. To je neprocjenjivo. Naučila sam da cijenim neke obične, jednostavne stvari u životu na koje inače ne obraćamo pažnju. Takođe, u misiji upoznate i steknete prijatelje za cijeli život iz svih krajeva svijeta, što je veliko bogatstvo.

**• Kakav je danas status policijski po Vašem mišljenju?**

- Status policijskih službenica u odnosu na raniji period je poboljšan i mogu reći da se svakim danom sve više značaja pridaje gender-balansu. U BiH se sve više radi na promociji i implementaciji UN-rezolucije 1325 žene, mir i sigurnost i poduzete su mnoge aktivnosti na implementaciji Akcionog plana BiH za implementaciju ove rezolucije. Primjetan je veći angažman žena u sektoru sigurnosti u BiH, kao i njihovo sudjelovanje u mirovnim operacijama širom svijeta, gdje se sve pripadnice bh. kontingenta nalaze na značajnim pozicijama i postižu izvanredne rezultate u svom radu.

**• U SIPA kažu da ste do sada postigli značajne rezultate u policijskoj karijeri. Možete li ih pobrojati?**

- Ako se rezultat rada svakog istražitelja mjeri brojem uspješno provedenih i okončanih krivičnih istraga, brojem krivičnih djela koja su otkrivena, rasvijetljena i dokazana, gdje su počinioci tih djela otkriveni i privedeni pred pravosudne organe, onda mogu da kažem da sam zaista postigla značajne rezultate u policijskoj karijeri. Sve to postigla sam zahvaljujući timskom radu, odnosno radu sa vrhunskim profesionalcima, kolegama od kojih sam učila profesionalno i odgovorno obavljati ovaj posao i od kojih ću, nadam se, nastaviti da učim. Ako imate sreću da radite sa takvim ljudima i uz to imate podršku profesionalnog i odgovornog menadžmenta, uspjeh i rezultati su zagarantirani.

